

# Qalam

Bilangan 87 Rabiul awal 1377 Oktober 1957 70 sen

## Kemerdekaan

Alhamdulillah, di dalam suara azan yang beriringan dengan dentuman meriam, kemerdekaan Tanah Melayu telah diisyiharkan - dengan itu Persekutuan Tanah Melayu telah menjadi sebuah negara yang merdeka, yang berdiri sama rendah duduk sama tinggi dengan negara-negara yang ada di dalam dunia ini. Kita bersyukur kepada Allah bahawa kemerdekaan yang didapat daripada penjajahan British ini tidaklah direbut dengan menumpahkan darah tetapi adalah dengan bersefahaman dan bersepengertian di antara yang menjajah dan yang dijajah.

Dengan ini maka negara merdeka Persekutuan Tanah Melayu menjadilah sebuah negara merdeka yang termuda sekali di seluruh dunia, dan sebagai sebuah negara yang muda itu dapatlah hendaknya pemimpin-pemimpin kemerdekaan yang menjalankan bahtera negara merdeka ini memandang kepada keadaan negara-negara yang baharu merdeka sesudah perang itu - meneladani, menyiasat dan mempelajari keadaan mereka itu dari dekat- mengambil mana-mana yang berfaedah dan menolak mana-mana yang bakal membawa bencana kepada negara dan rakyat persekutuan.

Kita patut memerhatikan keadaan-keadaan di Pakistan desudah kemerdekaanya, kemudian ke India, ke Ceylon, ke Burma, ke Indochina, ke Filipina dan seterusnya ke Indonesia yang hampir-hampir adat resamnya dan keadaan hidupnya seperti kita di Semenanjung Tanah Melayu ini.

Pelajarilah hendaknya segala perkara-perkara yang berbangkit yang berlaku di dalam keadaan kucar-kacir pemerintahan di Indonesia, sebab-sebabnya dan keadaannya semenjak mula merdeka dahulu. Kita banyak menyebarkan hal-hal itu dari wakil kita supaya ia dibaca dan diteladani.

Kita melihat bagaimana bahayanya kalau negara diperintah oleh orang yang bukan ahlinya. Yang amat berhormat Tengku Abdul Rahman Perdana Menteri sendiri telah pernah menyatakan (tatkala menyebut kerugian RIDA sebanyak \$5,000,000) bahawa sebab-sebabnya berlaku kerugian ialah kerana diserahkan kepada bukan ahlinya.

Kejadian di Indonesia membelakangkan dan mengeneplikan bangsa Indonesia yang terdidik di dalam Jabatan Tadbir Belanda dahulu, dengan memandang bahawa mereka alat-alat penjajah adalah merugikan dan memporak-perandakan kedudukan di Indonesia kerana tenaga ahli di dalam pentadbiran daripada bekas-bekas pegawai tadbir bangsa Indonesia yang bekerja dengan Belanda dahulu tidak diambil dan tenaga-tenaga ahli bangsa Belanda tidak mahu diterima bahkan sesudah merdeka itu, oleh ketua negara sendiri, bangsa Belanda itu dipandang musuh.

Akhirnya porak-peranda itu kita lihat diterbitkan oleh kuasa-kuasa siasah, yakni orang-orang yang bukan ahli di dalam pentadbiran, kerana ia orang parti disuruh mentadbir negeri- akhirnya negeri tidak teratur dan umat menderita dengan penderitaan yang hebat, yang harus belum pernah mereka rasai sehingga pernah dikatakan rakyat jelata yang telah mengeluarkan kata-kata bahawa lebih senang hidup di dalam penjajahan daripada di dalam negara merdeka sebabnya aman makmur, negara bahagia dan sejahtera tidak akan didapat selagi tiap-tiap kerja pentadbiran itu tidak dijalankan oleh ahlinya.

Kita sebutkan perkara-perkara yang tersebut ini, bukannya tujuan kita untuk memburukkan kerajaan

Indonesia, sebagaimana yang pernah disangka,tetapi yang kita tujukan ialah kepada orang-orang yang mentadbir negara itu yang menimbulkan kucar-kacir terutamanya atas cita-cita menegakkan negara Islam di Indonesia yang berpenduduk lebih 80 peratus umat Islam. Kita sebutkan lagi di sini hal itu adalah untuk cermin perbandingan, mudah-mudahan diperhati oleh pemimpin-pemimpin kita di dalam memandu negara merdeka yang muda ini supaya tidak membebankan rakyat dengan penderitaan- membawa kesenangan kepada beberapa orang-tetapi bahtera kemerdekaan ini hendaklah diasaskan untuk membawa kebahagian kepada seluruh umat di Semenanjung Tanah Melayu ini.

Kerana kemerdekaan yang kita dapat ini adalah dengan cara berbaik-baik dan bersefahaman dengan kerajaan British maka hendaknya tenaga yang perlu daripada ahli-ahli orang-orang Inggeris itu jangan ditinggalkan atau dibuang dengan perasaan sentimen tetapi tenaga itu hendaklah diambil untuk memimpin kita ke jalan kebahagiaan kerana kita sendiri sudah melihat bahawa kerana keahlian mereka maka kemakmuran didapat sekalipun sesudah perang dunia yang kedua ini, mereka menderita sepenuh dengan penderitaan.

Tenaga-tenaga ahli yang bukan daripada parti kita sendiri hendaklah didudukkan pada tempatnya yang asal supaya keselamatan pentadbiran terjamin kerana kita melihat bahawa kejatuhan kerajaan-kerajaan kita di seluruh gugusan pulau-pulau Melayu di Semenanjung dari dahulu itu sebab-sebabnya tidak lain kerana berebutkan kedudukan dan mencari maslahat diri. Hingga sekarang keadaan itu kita dapat lihat di negeri-negeri yang sudah merdeka terutamanya di Indonesia di dalam mana perbuatan kedudukan dan maslahat itu membawa kepada kucar-kacir negara dan membawa kepada penderitaan rakyat.

Mudah-mudahan pemimpin-pemimpin yang mentadbirkan negara merdeka sekarang dapat mengkaji dan menghalusi tiap-tiap langkah yang dijalankan supaya membawa kebahagiaan kepada umat di Semenanjung ini terutamanya kepada umat Melayu.

\* \* \*

### **Kita Dengan Perayaan Mawlid Nabi (SAW)**

Sesudah menyambut perayaan merdeka maka timbulah pula perayaan menyambut hari jadi junjungan kita Muhammad (SAW) yang biasa disambut dengan meriahnya di negara-negara kita di sebelah Timur ini. Sambutan ini sudah teradat diadakan dengan sebeginu rupa, di sana sini diadakan perarakan dengan perasaan atau tujuan kerana menghormati junjungan kita Muhammad (SAW) perbuatan itu adalah menjadi tanda bahawa kita memuliakan dan menunjukkan kasih sayang kepada junjungan kita.

Tiap-tiap tahun kita mengadakan perayaan itu tetapi sesudah habis perayaan keadaan dan kedudukan masyarakat kita, tidak juga berubah - habis perayaan, habis temasya yang meriah itu, maka keadaan masyarakat kita mendap semula, berkeadaan pula seperti sedia kala. Padahal segala tujuan dan maksud mengadakan perayaan itu tidak lain dan tidak bukan adalah kerana hendak memuliakan junjungan kita dan di sebalik menghormati itu maka hendaklah kita menjalankan suruhan-suruhannya, menerima pengajaran-pengajaran yang disampaikan olehnya, dan menjauhkan segala larangan-larangan yang diperintahkan kepadanya untuk disampaikan kepada kita, jangan melakukannya.

Sekarang Persekutuan Tanah Melayu telah merdeka. Di dalam kemerdekaan itu pula disebut bahawa agama rasmi bagi Persekutuan Tanah Melayu ialah agama Islam. Dan dengan sempena ini, dalam menyambut maulid Nabi (SAW) maka sangat utama bagi Persekutuan Tanah Melayu supaya